

東

華

續

錄

臣王先謙敬編

臣陶濬宣恭校

十一月壬寅朔命張祥河來京以王慶雲爲陝西巡撫

由戶部左侍郎遷

○子直隸靜海陣亡侍衛興林副都統銜祭葬世職如副都統例

遊擊懷唐阿等祭葬世職○癸卯

硃諭恭親王奕訢等本年冬

至南郊大祀朕親詣行禮惟因體疾致累恐升降失儀不足以

昭誠敬況朕思兩邊配案三獻往返行走亦覺稍繁朕意欲酌量

改減以嚴對越著恭親王等商酌妥協於明日見面時當面再奏

○諭內閣朕素聞天津地方民心強固物力豐饒所練鄉勇人等

類皆曉健整齊足資禦賊是以疊降諭旨令長蘆鹽政文謙等妥

爲激勸使之保衛鄉閭九月二十八日逆匪由青縣突竄天津彼

時大兵尙未到齊經文謙等分督防守官兵迎頭截勦該處練勇隨同天津縣知縣謝子澄直前迎殺擒斬甚多卽雁戶排槍亦足佐官兵槍礮之不逮該練勇等忠義勇敢洵屬可嘉使各屬地方盡能如此勤力同心不特自保身家並可上爲朝廷出力何慮逆氛不靖城守不堅文謙特克慎張起鵠錢忻和謝子澄平日撫馭得宜亦可概見著勝保傳旨嘉獎此時賊踞靜海獨流尙在天津境內諒該練勇同仇志切必不稍存畛域之心見在大軍四面合圍窮寇不難立殄而偵探嚮導尤以本地鄉勇爲得宜著勝保卽傳旨曉諭明定賞格如該練勇人等有能隨營帶隊力破賊巢者卽被格保奏優加賞賚上次天津出力各勇目姓名勞績朕已稔聞儻能始終奮勉剋期滅賊該大臣等自能仰體朕心有勞必錄正無慮功績不能上達也○諭袁甲三奏續勦擒匪三次獲勝一

指安徽潁毫捻匪疊經官兵痛加勦洗竄踞雉河集一帶復經袁
甲三督飭該地方文武協力進攻委員徐曉峯遊擊朱連泰等督
帶兵勇由花溝集直撲匪巢生擒捻首捻夥馬在龍等七十一人
其姪惡捻首孫重倫亦經兵勇擒獲另股潛竄臨湖鋪又經委員
徐毓寶李萼馨等會同該處團練生擒捻首官步雲並韓李子等
四十六名其馬家柳林老捻頭馬九馬老虎等欲圖聚眾劫犯經
守備戴世熙並遊擊李成虎等督帶練勇格殺無數當卽生擒捻
首捻夥馬九等四十七名並另獲積年捻首陳建中一名另派候
補千總連丕甲鄉勇劉倫等追擊捻首紀黑升等三名鄉勇王賢
曾等追獲捻首龐富等四名所有各處藏匿零匪疊經官兵搜勦
閼練查拏及親屬縛獻訊明正法者統計五百三十餘名歷次接
仗共殺捻匪千餘人擒頭二百餘人袁甲三督辦有方實屬不負

委任仍著嚴飭在事文武官紳練勇始終勿懈務將各股捻匪一律殲除淨盡以靖地方○諭軍機大臣等有人奏天津練勇數千
類皆慚力趨捷氣質强悍上月賊犯天津知縣謝子澄率領禦賊
該練勇相率盡力疊挫賊鋒又稱該縣長於撫馭是以練勇樂爲
效力等語前因勇目劉積德幫同官軍殺賊先後諭知勝保並鹽
政文謙查明保奏旋據文謙等奏以該處練勇人數眾多須查明
出力等差分別保奏昨又據勝保奏鄉勇馮玉德能入賊壘探聽
虛實是天津練勇均知同仇敵愾奮勇可嘉本日已明降諭旨優
予獎勸矣見在勝保軍營中天津練勇是否隨同打仗此等驍捷
壯勇如能駕馭得宜加以激勵必可助官軍之不足著該大臣與
文謙悉心商酌相機調撥或歸文謙統帶或卽令謝子澄帶領來
營助剿第未知兵勇合在一處有無牽掣情形必須妥爲布置善

用其長以收實效若官兵分紮營盤已敷勦辦或該練勇守城得力而於調撥獨流靜海轉恐遷地弗良卽著據實具奏勿稍拘泥將此由六百里諭知勝保並傳諭文謙知之○諭前因湖北賊匪滋擾諭令舒興阿將所帶官兵由信陽前赴楚省督同臬司唐樹義迅將陽邏一帶逆匪合力兜擒本日據吳文鎔奏賊已下竄武漢江面並無賊船舒興阿所帶陸路之兵可毋庸來楚等語見在賊匪盤踞皖省非厚集兵力不足以資期辦已疊次諭令江忠源星速赴任皖省情形實屬喫緊舒興阿著毋庸赴楚卽日帶兵由豫迅往安徽與江忠源會合進剿將安慶郡城及集賢關桐城等處賊匪迅速剿除以期肅清江北原片著鈔給閱看將此由六百里諭令知之○諭袁甲三奏勦匪連次獲勝並保舉出力員弁兵勇各一摺懷遠縣屬捻匪張茂等見復聚眾撲城該給事中尙未

能移營前進著卽飭令遊擊錢朝舉守備戴世熙等帶兵前往會同該縣併力攻擊並卽飭附近各州縣一體撥派兵勇援勦毋任旬結爲患另片奏北路空虛情形著照所請卽飭刑部主事朱麟祺在籍道員趙畊趨程馳赴舒城一帶督率練勇會合地方文武辦理防勦事宜務令桐城及早克復將此由六百里諭令知之○湖廣總督吳文鎔等奏陳已革同知勞光泰僨事情節得旨俟查拏勞光泰到案時據實訊明嚴懲上次批崇綸摺已指示分明總以實字還朕不必諄諄徒勞訓諭也又奏張亮基卸署督篆日期批朕聞該撫於交卸日乘夜渡江不辭而行有無其事著據實奏來不准回護○調羅惇衍爲戶部左侍郎李維翰爲刑部左侍郎何桂清爲禮部左侍郎以王茂蔭爲戶部右侍郎由太僕寺卿遷○甲辰諭軍機大臣等向榮奏迎勦高湧賊匪獲勝並遵派和春馳往徐

州等語高湻賊匪雖經痛勦而大幫船隻尙在蕪湖黃池一帶正
不能不防其窺伺蘇常復來滋擾該大臣見已嚴飭德安鄧紹良
等加意堵截仍須設法追擊將該匪船儘數焚勦萬不可再令他
竄至金陵城中賊情及見在如何籌攻未據聲敘該大臣擁兵城
下半載有餘坐使該逆分擾鄰疆往來自便是誠何心昨據袁甲
三奏八九月間金陵賊匪驅城中婦女裹以賊巾衣以賊衣使之
守城近復於城頭布滿吠犬藉作疑兵可見存城之賊無多茲據
孫銘恩奏十月十九日有賊營女船七十餘號自金陵上竄安慶
聲稱係僞易王家屬該逆潰圍之意已屬顯然朕聞向榮營中自
大礮鑄成後逆匪業已膽落金陵百姓有義約布告上江兩縣約
定數萬人訂期併力攻城之議該大臣何以不因民義憤用助兵
威急圖收復儻再因循日久餉竭兵疲該大臣計將何出所稱與

宜何時見諸施行卽如鎮海軍務派余萬清前往接辦該革員如何較勝諸將該大臣有無把握亦未據詳細具奏著向榮一面密籌克復金陵於該逆思竄各路節節堵截務將元惡大憝設計殲擒其密通內應情事尤須慎重迅速不可稍有洩漏轉爲奸術所誤一面剋期攻勦鎮城務當水陸各軍同時並舉俾該逆內外不能兼顧庶可得手見在許乃釗勦辦上海土匪大獲勝仗如卽就肅清可將黃浦江面挖晉夾板等船迅卽調赴上游並著許乃釗移軍鎮江先籌攻克以孤金陵賊勢仍飭余萬清統帶各軍趕早布置建功贖罪不得藉口船礮未齊株守以待儻仍遷延貽誤不能倖邀寬典也至大營軍餉著該大臣知照怡良許乃釗於蘇省額徵正雜各款並鹽關各課與捐輸銀兩內無論何款先行就近接濟毋得靜候部撥款項致誤事機將此由六

百里加緊諭令知之○以湖南綏靖鎮總兵官和春爲江南提督
○丙午諭內閣逆賊竄踞江南三城九閱月矣逞其兇狡荼毒生
靈天地不容神人共憤朕不惜重兵鉅帑救民水火之中而統兵
大臣勦辦遷延致令元惡稽誅堅城未復朕念及三城百姓遭罹
慘劫輒恨將帥無能而每聞該士民等忠憤同仇人思自奮又未
嘗不幸民心之大可用也本年四月以來疊據各路奏報如金陵
之四十八社揚州之虹橋紳董皆能同心勑力協助官兵卽東壩
紳士盤獲僞官擊毀賊船六合等處練勇斃賊至數千之多滁鳳
徐宿之間鄉民殺賊自衛者比比皆是可見敵愾禦侮忠義自在
人心特恐統兵大臣激勵無方或臨事不爲援應或論功不能覈
實以致義憤之民漸生疑慮功久無成在該士民等享國家二百
餘年昇平之福感奮出於至誠當此逆氛肆擾鄉里摧殘公義私

譬無不銘心刻骨逆賊奸詭殘忍惟以裏脅爲能爾士民等旣逼近賊蹤難保不爲所窘迫不從則受其屠戮從之則自外生成利害權衡定能熟計近聞三城賊匪勢已窮蹙且糧食不給專以據掠爲事克復之機時不可失又聞金陵百姓有義約布告上江兩縣約定數萬人併力攻城以義憤之民勦窮蹙之賊揆之天道人心斷無不克之理功成受賞朕將拭目俟之著通諭江南江北士民如果能設法破賊克城殲擒逆首倡義之人朕必優予爵賞其餘亦破格施恩並將該士民等應完錢漕免徵三年因一人之功推及一鄉因一鄉之功推及一邑諒爾士民亦當同深感奮也至帶兵大臣師久無功朕已屢加譴責所以不卽治罪者尙冀其自知愧奮力贖前愆若敢任聽將弁牽制義民使不得成此大功或功成之後冒竊邀恩一經訪聞法不稍貸如能兵民合力同破賊

巢墻穴捨渠互相策應不特免其遷延之罪仍可同膺懋賞之榮
其濱江一帶城鄉村堡強弱不同人心則一儻士民等力能殺賊
破船奪其輜重除優加獎勵外仍以所得充賞不准兵弁攘功其
人少力微僅能自衛者能將糧食等物收藏嚴密斷賊接濟事平
之後亦以功論至逆賊船隻皆自擄掠而來如船戶水手能乘閒
燒毀賊船擒殺逆匪自拔來歸者亦准報官論賞總之兵以衛民
民以助兵心貴相聯功不相掩軍營將弁及各屬士民等務須合
力同心盡殲醜類用副朕爲民除害之至意此旨著該督撫等刊
刻曉黃徧行曉諭咸使聞知○諭王懿德奏官兵克復廈門一摺
福建廈門自本年四月被匪占踞王懿德馳赴泉州督同勦辦節
經施得高李廷鈺督率護金門鎮總兵孫鼎鼇副將呂大陸暨候
選知府王朝綸等設法據險進攻分路夾擊於十月十一日克復

全島前因匪徒占踞廈門同安我兵未能兼顧以致仙遊等處日
肆鳴張經此次大兵進剿克復堅城辦理尙合機宜其三都石碼
海澄等處餘匪著王懿德督飭帶兵各員乘此聲威迅速勦辦並
將前遵等處匪徒一律肅清毋再延緩逆賊黃德美黃位是否被
擒仍著確查具奏並著查明係何人首先入城及在事出力文武
員弁分別保奏候朕施恩毋許冒濫○安徽布政使劉裕珍奏十
月三十日舒城防期之漢中鎮總兵恆興來廬據稱舒城已於二
十九日申刻被匪攻破前因桐城失陷時侍郎呂賢基在舒團練
臣於萬難措手之際籌餉力圖接濟刻下廬郡僅存鄉勇千
名口糧又復不濟情形危急聞新任撫臣江忠源已帶兵二千名
來皖於二十七日行抵六安州因感冒風寒在彼暫住頃聞於三
十日力疾由六安前至舒城臣擬於初一日委員齋送巡撫關防

文江忠源接受一面號召鄉團設法防堵 上諭劉裕珍奏舒城失守一摺覽奏實深憤恨恆興以專閫大員前因桐城失守業經降旨革職並查明如有退縮逃避等情卽一面奏聞一面正法今既在舒城防勦何以遽行折回況舒城於二十九日申刻失守恆興於三十日丑刻已至廬郡距失守不過數時顯係奔命逃回似此畏葸無能之員尙何足惜恆興著卽行正法以肅軍令○諭軍機大臣等蔣霨遠奏甕安縣榔匪滋事拒殺差役見飭臬司查辦一摺據稱甕安縣地方有劉瞎么等糾眾齊榔沿村勒派不從者任意拷打焚燒房屋並建蓮經廟爲議事之所民間詞訟不准到官勒令出錢了事經該撫委員查拏該匪贍取持械抗拒將差役殺死經黎平府知府胡林翼等督兵前進格斃楊三三等多名見在商賈不通文報阻塞等情該匪等聚眾立廟陵虐無辜已屬督

不畏法迨官兵查拏輒敢拒殺差役若不嚴拏懲辦何以肅法紀而微子頑著蔣霨遠責成臬司孔慶鋗及知府胡林翼等迅速查拏盡絕根株毋任一名漏網並著設法解散脅從勿令與苗匪勾結別生事端將此由五百里諭令知之○諭前因皖省情形喫緊當令舒興阿毋庸赴楚卽日馳往安徽會同江忠源勦辦安慶等處賊匪本日據劉裕珍奏稱舒城於上月二十九日失守廬州危急等語見在江忠源已抵皖省由六安馳赴舒城惟該撫所帶兵僅二千名不敷勦辦著舒興阿遵照前旨督兵飛速前進會同江忠源合力進攻保衛廬郡並設法克復舒城桐城安慶等處以期肅清江北遏賊分竄萬勿遲延致干重咎將此由六百里加緊諭令知之○諭劉裕珍奏舒城失守廬州危急一摺前因桐城失陷諭令江忠源等合力進攻茲逆匪復竄舒城偏近廬州情形更爲

緊要袁甲三勦辦潁亳一帶土匪勢難兼顧江忠源已抵皖省由六安趕赴舒城著卽督率兵勇剋期攻剿速殄賊氛該撫忠勇素著屢立戰功朕所倚畀見在初莅皖任適值逆匪肆擾防勦緊急所帶兵僅二千名不知前募楚勇能否趕到又聞該撫力疾前進朕心殊深羈念軍需一切總須酌度緩急相機籌辦劉裕鈔招集團練設法防堵務當激勵固守保衛廬郡各處要隘仍須布置周密呂賢基在舒城辦理團練尙無下落實深懸繫著卽查明具奏徐廣緝前經英桂奏畱歸德防勦土匪須俟豫境漸就肅清方能赴皖將此由六百里加緊諭知江忠源並傳諭劉裕鈔知之○劉裕鈔奏報舒城失守情形得旨呂賢基尙無下落實深懸繫該侍郎素懷忠義必能大節無虧恆興又像逃回者呂賢基已亡恆興豈能使活○丁未諭軍機大臣等據勝保奏見在籌辦攻勦各摺

片該逆負嵎死守已逾一月若不趕緊設法勦滅恐賊窮必竄師老則疲又成餘燼復然之勢該大臣膺茲重寄必應密籌全局迅奏膚功以紓朕念見在東南一帶尙覺空虛據稱賊匪欲由東路奔竄雖已嚴飭西凌阿善祿加意防範仍恐兵力不敷前諭勝保催提之張集馨郝光甲所帶各兵是否迎提到營並著隨時相機布置斷不可令賊他竄德勒克色楞本係幫辦勝保軍務見已諭知僧格林沁迅飭該貝子赴營協同攻剿另片奏請增給馬乾銀兩等語卽照所請見在軍營馬乾准其札行糧臺每馬一匹日給馬乾銀一錢以示體恤將此由六百里諭令知之○諭琦善奏連日設計督攻情形並金陵逆匪欲援揚州各摺片已詳晰批示限於八九日內攻破揚城諒該大臣必當懔遵諭旨迅速籌攻摺內所陳明攻暗投各法均係軍營中應辦之事何必如此鋪張詫爲

祕計著琦善等卽遵批諭依限克復城池使逆黨勢孤望絕則續來之逆匪間風膽落易於殲擒另片奏續提泰州等處存漕接濟兵糧卽著照議辦理兵餉如此支紓而帶兵大臣猶不趕緊籌畫攻克揚州坐視賊匪他竄該大臣等尙有何顏對朕邪將此由六百里加緊諭令知之○琦善等奏連日設計督攻揚州情形得旨琦善在軍營日久無功若再不將揚州克復盡殲醜類何顏對朕何顏對天下之人此時鋪張過甚迨賊竄後何以自解即使盡屬實在情形亦不必如此鋪張朕總以能否收功爲定斷著琦善等於此摺到日限於八九日內務須攻破揚城殄滅無遺不准再令蔓延又滋他患又奏揚州被圍窮困聞金陵逆匪欲來援應批觀此情形更不可不急攻揚州尤可慮者該逆豈肯坐以待斃思竄無疑設南路援應賊至尤不可顧此失彼朕日夜盼捷音之速至

也○轉雷以誠爲刑部左侍郎以李鈞爲刑部右侍郎

由內閣學士遷

○

戊申諭內閣已革陝安鎮總兵郝光甲前經派往河南交舒興阿調遣嗣因該革員帶兵行抵連鎮經勝保奏令趕赴獨流大營聽候調撥復據勝保奏參該革員遲延半月尙未到營當卽降旨革職仍交勝保差委茲據舒興阿奏稱郝光甲所帶之兵已據呈報於十月初八日由直隸阜成縣奉文折回等語覽奏殊堪詫異該員旣已行抵連鎮何以復行折回旣據稟報未奉勝保飭令赴豫札文何以又有呈報舒興阿奉文抵豫之說且覈計程途時日種種情節支離實不可解當此軍務喫緊之際豈容此等庸劣畏葸之員遷延觀望貽誤事機著勝保迅卽查明郝光甲見在逗遛何處掯訊明確如係捏詞支飾不遵調度著卽遵照前旨以軍法從事毋稍姑息尋舒興阿奏郝光甲呈稱十月初七日在阜城縣奉

勝保札飭馳赴河南遵卽兼程趨進於十月三十日行抵陳州又奉勝保札飭赴靜海如已出直境卽迅赴河南毋庸折回等語查陳州距靜海寫遠未便令該鎮折回已飭郝光甲隨赴安徽會勦並移知勝保報聞○曾國藩奏臣奉派兵救援湖北之旨卽函商撫臣派候補知府張丞實候選同知王鑫帶湘勇三千前赴湖北尙未啟行連日接湖北撫臣來函賊船於十月初五後陸續開赴下游武昌解嚴則援鄂之師自可稍緩因思該匪以舟楫爲巢穴以據掠爲生涯長江千里任其橫行我兵無敢過而問者前在江西近在湖北凡傍水城池莫不殘毀皆由舟師未備無可如何今若爲專保省會之計不過數千兵勇即可堅守無虞若爲保衛全楚之計必須多備礮船乃能堵勦兼施夏間奉到諭旨飭令兩湖督撫籌備舟師署督臣張亮基造船運礮設法興辦尙未完備忽

於九月十三日田家鎮失守一切戰船礮位盡爲賊有見在兩湖
地方無一舟可爲戰艦無一卒能習水師今若帶勇但赴鄂省則
鄂省已無賊矣若馳赴下游則賊以水去我以陸追不能與之相
遇又何能痛加勦洗再四思維總以辦船爲第一先務臣見駐衡
州卽在衡城試行趕辦俟舟師辦有頭緒卽行奏明臣親自統帶
馳赴下游目下武昌無賊臣赴鄂之行自可暫緩不特臣不必遽
去卽臣與撫臣商派援鄂之湘勇三千亦可暫緩啟程臣已咨明
撫臣飭令帶勇之張丞實王金無庸啟行如礮船尙未辦齊逆船
仍復來鄂則由臣商同督撫隨時斟酌仍專由陸路先行赴援斷
不敢有誤事機得旨所慮俱是汝能斟酌緩急甚屬可嘉○己酉
諭內閣據江忠源奏逆匪攻陷舒城呂賢基殉難等語呂賢基由
翰林科道淳任京卿朕因其品學兼優超擢侍郎本年春間令其

曰每督辦團練頗能實力任事該侍郎年力正強方資倚畀乃以
逆匪竄擾舒城捐軀盡節悼惜殊深呂賢基著追贈尙書銜照尙
書例賜卹任內一切處分悉予開復應得卹典該衙門察例具奏
伊子編修呂錦文著俟服闋後以侍讀升用尋子祭葬世職諡文
節○諭軍機大臣等葉名琛柏貴奏龍川東江等處匪徒滋擾戕
官各一招覽奏曷勝憤懣龍川縣土匪旣經署遊擊王世英等帶
兵進剿各匪聞風潛逃探聞見已解散著卽督飭該遊擊等乘勢
搜捕盡數殲除勿令再有勾結致滋蔓延其東江一帶土匪卽嚴
飭總兵壽山並署廣州府知府郭超凡迅速籌勦以期盡殄羣兇
至另片奏籌撥各路餉銀業已委員陸續起解刻下各路軍營需
餉甚殷京餉亦待用孔亟著該督撫卽飭解餉委員迅將所解銀
十五萬兩分解宿遷鄭敦謹法良兩處糧臺其餘銀兩趕緊解赴

部庫交納勿稍遲延另籌捐輸及關稅銀二十萬兩並著迅卽派員解部並飛速知照沿途地方官一體催趲遄行並飭小心防護不得稍有疏虞至向榮軍營前據怡良等奏稱籌餉亦甚支絀並著該督等隨時籌款迅速接濟將此由六百里諭令知之○江忠源奏臣於十月十八日由鄂赴皖兼程前進二十六日抵安徽霍邱縣境之洪家集忽感風寒寒熱交作二十七日力疾行八十餘里酉刻至六安州城病益增劇不得不暫留州城趕緊醫治三十日忽接探報賊於二十九日申刻進陷舒城工部侍郎呂賢基殉難臣聞信之下痛憤填胸查舒城距廬州僅百二十里距六安州亦百二十里均爲賊北竄要途而廬州爲新改省會尤關緊要應卽星夜趕赴接篆視事以固根本柰連日服藥病勢轉加萬難就道因就六安連夜布置守城等事一面飛咨署撫臣劉裕珍趕緊

於廬郡安爲布置僅賊由舒至六臣誓與城存亡若由舒至廬亦不敢俟病全愈但能扶掖上輿卽當帶兵赴援臣受恩深重正值軍務緊急之時而身邁沈疴焦灼萬狀然一息尚存誓當竭一息之心力以冀仰答聖恩於萬一上諭舒城偏近廬州該撫見因感受風寒不能前進朕心實深懸繫見當防勦喫緊之際督辦需人本日已諭令福濟兼程馳赴廬州六安一帶會同該撫及劉裕珍督率地方文武辦理防勦事宜該撫如尙未痊愈所帶兵勇卽可交福濟酌量調撥如已就痊著卽與福濟相機籌辦飭將桐舒等處賊匪併力殲除斷不可任令北竄舒興阿見在帶兵由陳州赴皖並著咨催迅速前進袁甲三見在勦辦捻匪勢難兼顧廬郡仍著該撫隨時知照該給事中毋令潁亳一帶捻匪與該逆匪勾結爲患將此由六百里加緊諭知江忠源並傳諭劉裕珍知

之○諭舒城密邇廬州爲南北咽喉最關緊要呂賢基業經殉難江忠源復因患病不能前進暫駐六安守禦袁甲三勦辦頗毫一帶捻匪又未能兼顧見值勦賊喫緊之際督辦無人恐誤事機著福濟卽行馳赴廬州六安一帶會同江忠源督率該處文武擇要防勦江忠源如尙未痊愈其所帶兵勇卽由福濟酌量調撥以資攻勦總期力圖克復遏賊北竄安徽情形緊急該督接奉批旨務卽星速萬勿耽延所有揚州灣頭一帶防勦事宜卽責成慧成與雷以誠督同查文經等妥籌辦理毋得稍有疏虞將此由六百里加緊諭令知之○以周祖培爲工部左侍郎由左副都御史遷○予廣東陣亡同知王治溥等祭葬世職○庚戌諭內閣前因桂良奏參署直隸藩司張集馨赴調遲延當經降旨將該員革職發往新疆效力贖罪茲據勝保奏稱張集馨見已管帶兵勇趕到著准其暫緩

發遣畱於勝保軍營帶兵隨勦儻再不知奮勉著卽以軍法從事
○諭軍機大臣等勝保奏近日攻勦情形又另片自陳衷曲等語
朕因勝保勇敢忠誠特命統領諸軍廓清畿輔責任綦重倚畀至
專惟望其迅殄賊氛拯民水火自逆匪竄踞靜海獨流距京較近
又命僧格林沁駐兵北路爲京師之屏障卽爲該大臣之聲援實
係必不可少之舉試思逆匪被勦窮蹙伺隙奔逃儻北路稍虛豈
能杜賊紛竄勝保與僧格林沁共辦一事自應不分畛域兩營聲
息時刻相通乃以僧格林沁遣官弁等至營探聽遠謂爲監察軍
情是自疑因以疑人其所見亦甚狹矣並稱請派親信重臣督率
辦理尤屬非是試思該大臣身爲統帥豈非親信重臣乎朕旣畀
以重任豈復有所猜疑果能奮勉圖功盡殲醜類迅奏蕩平上可
以慰朕心下亦可以孚眾望悠悠之口何足介意邪勝保以天下

安危自任惟有上知有朕其他勿恤朕亦深知汝能體朕心成此大功但任事之人自有難處不待汝言朕已早鑒見在逆匪勢窮思竄若伏兵要路誘賊離巢爲截擊之計是否確有把握儻徒爲收復獨流靜海起見縱令竄逸勦辦更難得手至所稱於上游築壩洩水斷流以冀剋期滅賊自係要務卽趕緊籌辦萬勿再有遲延該大臣忠勇素著諒能計出萬全不負委任也將此由六百里加緊諭令知之○琦善等奏前據儀徵縣知縣都棨森稟稱疊有賊船百餘隻自金陵順流東駛隨後船隻仍在沿江游駛等語臣等查此次賊黨赴援數逾巨萬業已分股先擾浦口勢必會合大股悉赴瓜州而六合儀徵亦復處處喫緊當經分飭加緊嚴防初二日申刻果有瓜州賊匪三百餘人由運河東西兩岸窺探經我兵分股迎擊旋卽退回初三日又有賊匪四五千人由西岸繞

至高明寺迤西直對三汊河官兵營盤意圖攻撲經參將吉遠等
帶兵迎擊傷斃賊匪及落水死者約有四五百名適瞿騰龍德興
阿帶兵赴援又經轟斃賊匪四五百名正在進剿得手之際忽於
是日酉刻據報金陵賊匪於初二日申酉間竄至儀徵沙漫洲分
股登岸哲克東阿張守仁卽帶滿漢官兵連夜前往迎剿初三日
巳刻賊匪先撲南門旋撲西門縣城業已失守查該逆竄踞儀邑
距揚止數十里道路紛歧四通八達皆爲軍營後路兵丁止有此
數竇有防不勝防之勢見將揚城前後兩路竭力籌堵並飛飭浦
口六合等處加意嚴防 上諭儀徵距揚州甚近道路紛歧皆爲
我兵大營後路形勢最爲緊要該大臣等何竟毫無防範一至於
此此時若不趕緊設法克復儀徵我兵腹背受敵其患何可勝言
著該大臣等迅卽派委大員帶兵馳往勦辦所稱賊眾圍困營盤

哲克東阿等打仗情形尙無消息是否派兵前往救援未據聲敘
儀徵失守顯有內應該縣都榮森平素不得民心賊至並未堵禦
見在何處著查明如有逃避情事卽以軍法從事浦口瓜州賊匪
經瞿騰龍等屢次擊退仍著督飭該總兵等加意嚴防遏賊北竄
將此由六百里加緊各諭令知之○辛亥諭軍機大臣等據恆春
奏地丁銀兩礙難借徵一摺所奏自爲體恤民情起見見在軍餉
如此艱難鉅款萬無可措不得已而議及借徵不特非朕心所願
卽在廷臣工亦誰不知辦理之難該撫身膺疆寄督率屬員自當
於萬分棘手之中力籌辦法乃甫經奉旨卽先存畏難之見但顧
一己之名其如國計何況被賊地方悉與剔除徵收限期又准該
撫酌覈辦理朕於此事亦已詳度再三惟恐民間稍形苦累卽下
農小戶燒確畸零有不能一概辦理者法外之意謬責所未明言

全在大吏風示開導使官與民隱微相喻方爲安善豈可因一州
一縣偶有災荒遂將本省及鄰省大局通行牽掣果如該撫所奏
州縣徵糧向不至浮收數倍此朕所亟望於該省官吏者眞能絲
毫不染民間自必樂從著該撫卽行遵照前旨妥爲宣示其一切
詳細辦法卽著隨時酌覈辦理總期嚴除弊端廣儲軍餉不可首
倡難辦之議使恩歸於己怨歸於上也至該省見辦捐輸據稱竭
力勸諭務較往屆加增並催下忙錢糧迅速啟解著卽認真分別
妥辦毋稍遲延本日據前任祭酒彥昌奏請給發官票勸諭富戶
出銀一摺是否可行著該撫體察情形妥爲辦理原摺著鈔給閱
看將此由六百里諭令知之○以富興阿爲左副都御史由光祿寺卿遷

○王子諭內閣 天壇大祀鉅典攸關凡陪祀之王公大臣以及
執事各員均應整齊嚴肅嘉慶八年欽奉 諭旨諸王以下及滿

漢頭品大臣年在六十五以上者准其坐轎至二層門外此外頭品年未至六十五以上及二品大員均不准坐轎進頭層門以崇體制等因欽此煌煌 聖訓允宜永遠懷遵乃近來執事大小各員往往不遵舊制任意出入殊非恪恭將事之道著申諭各衙門嗣後 郊壇大祀均應遵照嘉慶年間 諭旨並著稽查 壇廟王大臣並稽查 壇門 壇內各大臣等一體認真查察如有不遵定制之員卽行嚴參其僕從跟役擁擠喧嘩及閒雜人等闖入者一併查拏懲辦○諭軍機大臣等前經疊降諭旨令舒興阿馳往安徽會同江忠源勦辦逆匪未據該督奏報何日抵皖昨因呂賢基殉節江忠源因病尙在六安賊氛逼近廬州已令福濟馳赴該處督辦防勦惟揚州尙未攻克儀徵又復失守福濟之能否分身前往尙不可知河南雖界連楚皖惟楚北賊船已經下竄唐樹

義帶兵跟蹤追擊該匪必順流而下設與皖省匪徒彙爲大股北向奔突不但廬州可危卽潁鳳蒙亳一帶皆係曾被蹂躪之區兵勇無多人心未固捻匪復時常出沒儻經該逆旬結肆擾勢將不可撲滅惟有趁其未至廬州迅速帶兵前往保衛力遏賊鋒方可設法收復舒城桐城安慶等處該督前奏以陳州歸德光州各屬毗連皖境因請駐守陳州是藉防堵爲名置兵於無賊之地於事勢緩急道途險易絕不一加忖度是誠何心賊情剽疾異常我兵遷延愈甚近來統兵大臣率蹈此種惡習舒興阿乃亦出此實所不解著該督於接奉此旨後卽日兼程馳抵廬州與江忠源迅籌攻剿其皖豫交界各處均在潁毫後路大兵經行便可隨處察度兼顧不得因已派福濟帶兵應援遂觀望不前徒糜軍餉儻該督赴皖遷延以致賊蹤北竄朕豈能置舒興阿於不問邪仍著該督

將行抵皖境日期先行迅速具奏本日據青磨奏咨商該督撥兵
防堵信陽光州各要隘已諭知英桂就近酌量派防矣將此由六
百里加緊諭令知之○諭前據吳文鎔等奏賊船停泊黃州省城
未可撤防本日復據青磨奏德安精兵調空鄉勇未盡可恃是該
督與該學政一則防賊回竄一則慮賊旁擾均係就所駐之地而
言此時巴河一帶爲賊蹤蟻聚之所自以急勦黃州逆匪爲尤要
楚省兵單卽併力進剿猶恐不能得手豈可再於無賊之地分布
設防見在青磨已飭副將駱永忠馳赴黃州本日復傳諭唐樹義
盡力跟勦著該督等悉心體察如防城兵勇尚可分撥卽行酌量
調往庶可得力其德安府城係北連豫省之地亦關緊要已諭知
青磨妥爲防守據青磨奏十月二十三四日唐樹義獲有勝仗二
十八日復有大股直撲黃州兵皆潰散未據該督撫奏報朕心甚

爲懸繫又據奏稱潮勇素稱頑健儻散布句結尤爲可慮此項潮
勇用之固難若驅之不用又恐助逆爲患應如何駕馭彈壓著與
清督妥商辦理將此由六百里加緊諭令知之○癸丑諭軍機大
臣等前據向榮奏遵旨派和春馳往徐州所有鎮江軍務卽委余
萬清接辦該革員能否勝任曾降旨查詢未據覆奏茲據怡良許
乃釗奏稱鎮江地方緊要斷非生手所能接辦請仍令提督和春
一手經理等語自係實在情形和春著仍畱鎮江統帶水陸諸軍
以資籌勦無庸前往徐州該大臣等卽責成該提督迅速克復鎮
江無稍延緩余萬清著卽飭令渡江交江忠源酌量差遣本日據
宋晉奏東堵爲蘇省咽喉請於堵口一帶立木椿木城以資守禦
等語如此布置能否得力該大臣等酌度辦理原片著鈔給閱看
將此由六百里加緊各諭令知之○諭見據王大臣會同該部議

設兩河河庫道一缺已依議行矣楊能格見署江南藩司著卽令其接辦糧臺事宜並著琦善飭令鄭敦謹將糧臺經手事務移交清楚卽回河南藩司本任毋稍遲延將此由六百里加緊諭令知之○諭本日據宋晉奏曾國藩鄉望素孚人皆樂爲效用請飭挑選練勇雇覓船隻順流東下與江忠源水陸夾擊速殄賊氛等語前因湖北緊要諭令該侍郎督帶楚勇駛出洞庭湖迎頭截剿旋據該侍郎奏稱武昌見已解嚴擬暫緩赴鄂卽在衡州趕辦戰艦添置礮位敎練水師各等情諒已辦有頭緒見在安徽逆匪勢甚猖獗連陷桐城舒城逼近廬郡呂賢基已經殉難江忠源又復患病暫駐六安不能前進皖省情形甚屬危急總由江面無水師戰船攔截追剿任令賊踪往來自如以致逆匪日肆鴻張該侍郎前奏亦曾籌慮及此著卽趕辦船隻礮位並將前募楚勇六千由該

侍郎統帶白洞庭湖駛入大江順流東下直赴安徽江面與江忠
源會合水陸夾擊以期收復安慶及桐舒等城並可牽掣賊匪北
竄之路見在廣東紅單船數十隻計已由閩入江又有艇船數十
隻均可備夾擊之用該侍郎忠誠素著兼有膽識朕所素知諒必
能統籌全局不負委任也將此由六百里加緊諭令知之○諭張
之萬奏擒匪聚眾速宜搜剿並請飭撫臣將南汝光歸陳一帶州
縣文武緝捕事宜認真查辦等語河南光州之固始陳州之沈邱
項城俱時有大股捻匪焚搶居民必應及早殲除免致與粵匪勾
結該撫見駐南陽其光州一帶捻匪卽督飭總兵柏山迅速剿辦
牛鑑交卸臬篆後卽著馳赴陳州等處與徐廣縉專辦剿捕捻匪
分路搜緝務將首夥各犯悉數殲擒勿畱餘孽捻匪聚散無常此
摺彼竄全在地方文武員弁認真緝捕不得以該匪逃散卽爲了

事英桂到任未久無所用其回護該地方官如有緝捕不力不能
固結民心認真辦理團練者卽著從嚴參辦毋稍姑息原招片著
鈔給閱看將此由六百里諭令知之○直隸總督桂良奏報得雪
情形得旨見在賊匪未除吾民何由欣忭況冬雪雖霑開歲農工
爲日甚長未至新秋何能稍存侈大覽茲幕客間文反增愁悶耳
爾爲大吏者尤當以從實爲第一要務○裁南河河庫道缺歸淮
揚淮海淮徐各道管理○賞前湖北武昌陣亡總兵官常祿子中
書霍隆武員外郎○乙卯諭內閣前據戶部尙書孫瑞珍奏請援
照成案捐輸舉人以濟軍餉當交巡防王大臣軍機大臣會同戶
部議奏旋經御史何其仁錢慶善彭慶鍾等各具摺請飭停議所
奏均不爲無見茲據惠親王等遵旨悉心酌覈會議具奏並援引
道光年間 諭旨及上年朕所降諭旨聲明湖南附生李概福建

原生黃貽楫均係捐貲助餉特旨賞給舉人若定爲捐例轉不足以昭異數等語著照所議此後各直省曾應鄉試各生捐備軍餉如李概黃貽楫捐數者由各該將軍督撫等據情入奏或由部聲明請旨候朕施恩不得徑行請給舉人致違定例所有孫瑞珍請援案捐輸舉人之處仍著無庸議至錢慶善請諭令孫瑞珍之子弟回籍試行勸捐識見鄙屑殊失政體著傳旨申飭○諭軍機大臣等戶部奏河東鹽務亟籌變通一摺河東鹽務自有僉商之議百弊叢生近年以來酌議章程屢定屢改不過調停於長商短商之間仍未能經久不懈據該部奏請就見在運商一百餘家各按該地之多寡家貲之厚薄令其捐免充商永無僉舉之患該商無不樂從所有鹽課另議就場徵收恤商裕餉誠爲兩得之計據該部約計捐貲可得銀數百萬兩軍餉要需亦可藉資接濟至就場

徵課該部所陳各條果能經理得人必當日有起色恆春前在山西歷任有年於該省鹹政情形定能洞悉今任巡撫鹹政是其兼管並應妥籌良法與時變通著卽照該部指陳各節體察情形速議章程奏明辦理並先將捐免銀數覈實奏報聽候撥用毋得任聽屬員蒙混遷延致滋貽誤原摺著鈔給閱看將此由四百里諭令知之○諭勝保奏初九十二等日靜海獨流兩處剿賊獲勝一摺此時逆匪窮蹙已極自不難立就殄滅北路一帶經僧格林沁疊次奏報防堵悉臻周妥惟西路一帶似尚不甚可靠見在慶祺紮營正在獨流西面著僧格林沁卽行傳旨諭知該侍郎酌度緩急嚴飭西路各營鎮將悉力堵截儻有防範不嚴被賊竄逸情事朕不但將不遺調度之鎮將從重治罪卽慶祺亦不能辭咎該大臣前派伊勒東阿那敷德帶兵前往慶祺軍營協剿想已早籌及

此務當嚴飭各營將弁不分畛域合力同心殄此窮寇以慰朕望
將此由六百里加緊諭令知之○諭琦善奏勦辦揚城竄匪及三
汊河賊匪一招並儀徵營兵回揚情形等語自本月初三至初七
等日疊次接仗揚城如何攻復大軍如何布置旣未見有把握所
奏各情不過數日中小有斬獲據各營稟報入告於實在賊情若
何未曾查明敘及此時皖境賊氛愈熾南岸江鎮兩城亦收復無
期上海土匪破猖明歲漕運北來河海兩途俱難懸斷朕心焦灼
該大臣豈不知之稍有天良亦當感愧思奮見在大兵萃聚揚州
如先將郡城克復則儀徵瓜州自必勢如破竹儻先行分兵收復
儀徵乘賊入城布置未定易於得手並將瓜州三汊河賊蹤截斷
不至互相接應則揚城之賊勢益孤亦不難於勦辦該大臣等擬
如何進攻當有成算疊次所降諭旨責備成全均有深意儻再因

循日久國法具在不能曲宥也哲克東阿等如何下落儀徵賊匪是否占踞抑欲他竄見派何員帶兵往剿均著迅速查明具奏其七里店一帶卽著陳金綏嚴防扼守毋令該匪竄越爲要將此由六百里加緊各諭令知之○勝保奏攻剿獨流獲勝得旨汝之忠誠奮勇使朕欣慰實汝之福而朕任汝無疑亦無愧於知人也○丁巳諭內閣本月二十二日冬至 南郊大祀前經降旨朕親詣行禮茲因體疾致累恐升降拜跪未能如常不足以昭誠敬著派恭親王奕訢恭代行禮○諭刑部奏請酌定私鑄大錢罪名一摺本年刑部辦理王立兒私鑄大錢一案照新定私造官鈔章程擬以斬候業經照議允行惟原情定罪法在必行見當局鑄大錢膽敢玩法私造卽立置重刑亦屬罪有應得但恐承審各官或因罪名甚重改移情節巧爲開脫是峻法徒爲虛設而藐法奸民轉因

此而倅免嗣後私鑄大錢人犯著卽照刑部所請首犯匠人俱發
新疆給官兵爲奴所有前議斬候之王立兒等一案卽著照此辦
理至私鑄大錢爲數較多或數不及十千而私鑄不止一次者並
著照私鑄制錢本例辦理○戊午諭軍機大臣等舒興阿奏派兵
搜捕皖豫交界各處捻匪並遵旨籌防各摺片捻匪乘機肆擾必
宜及早殲除英桂見駐南陽其信陽光州一帶自可督飭總兵柏
山迅速籌勦前已有旨令藩司鄭敦謹速回本任牛鑑交卸臬篆
後卽赴陳州等處與徐廣縉專辦勦匪事宜其潁鳳蒙亳各處土
匪袁甲三見亦辦理得手惟廬州十分緊急江忠源病尙未愈福
濟之能否應援亦難豫定著該督仍遵照疊次諭旨卽行督兵兼
程前進飛赴廬州與江忠源會籌攻勦近期收復安慶及桐城舒
城等處毋稍遷延致有貽誤已革總兵郝光甲自山西帶兵前赴

直隸沿途稽詶耽延不進已諭令勝保嚴查如係有心逗遛卽以軍法從事見旣帶兵折回豫省著該督飭令該革員戴罪自效派赴前隊勦賊如再不知愧奮卽著於軍前正法以肅軍律近來領兵各員畏葸退縮幾成錮習實堪痛恨該督務當振刷精神以作士氣毋視訓誡爲具文也將此由六百里加緊諭令知之○戶部奏遞議淮安關監督福瑞短收稅銀請寬免處分子限三年完繳得旨福瑞處分原可寬免該監督因顧國謀攸關率行自請免議殊屬贍大著改爲降四級畱任不准抵銷戶部堂官並未看出依標議准寬免處分亦屬非是祁寯藻等著申飭○己未諭內閣莊親王奕仁奏請諭外藩捐輸一摺我朝撫馭外藩恩義兼至歲時朝覲方且賞賚有加前因籌辦軍需外札薩克各蒙古部落呈請報效朕嘉其忠悃優予褒獎不令捐輸正期軍務及早告竣與遠

近清服同享昇平之樂豈有因其愛戴情殷不加體恤之理奕仁
妄言無知不識大體著傳旨申飭○諭軍機大臣等據唐樹義奏
追擊逆匪情形及帶兵旋省另籌勦禦一摺逆船蟻聚巴河一帶
自二十一日至二十八日經唐樹義疊次攻剿均不能得力而該
逆彼猖愈甚見復聚集蘭溪蘄州田家鎮等處並有添築土城情
事是黃州一帶江面全爲賊踞而下游賊船亦復不少該處毗連
皖豫閩繫北路大局自應迎頭截剿扼其北竄之路乃該臬司一
路尾追復以省城兵單遽行帶兵折回武昌竟致置兵於無賊之
地實不可解著吳文鎔崇綸傳旨諭令該臬司仍卽帶兵星夜渡
江前進督同候補知府伍煌等務將黃州一帶逆匪併力夾擊以
挫賊鋒仍兼防北竄之路斷不准藉口兵單致滋貽誤至武昌防
守事宜並如何派撥兵勇協剿之處卽著該督撫等熟籌兼顧毋

誤事機將此由六百里加緊諭令知之○袁甲三奏竊維自古禦敵之道不外防勦然必能勦而後能防所謂能戰而後能守也粵賊竄擾數省皇上籌兵籌餉無一處不防究無一處能防者何哉地散則難守兵分則難支軍興數載未聞聚各處防兵與粵賊決一死戰而一隅有警四隅籌防左支右紓賊之所至徒供一瀆卽日取失守者而議之亦屬於事無濟此專言防而不言勦者之貽誤事機也卽如安徽一省除江南徐揚金陵本屬接壤此外楚豫蘇浙江連界之區不一而足紛歧錯出門戶甚多而建省安慶則以大江分南北今建省廬州又當以廬州分南北賊踞安慶長江之陰皆爲賊有安慶直如粵逆傅舍廬郡以南不勝防矣此外陸路則浦口爲第一門戶梁山爲第二門戶其三最要則臨淮其四則固鎮水路則由裕溪東關直達廬郡不過百數十里由盱

貽至臨淮亦不過二百餘里下則和州之烏江上則桐城之樅陽
由舟登陸直通驛傳若專事言防一處之險駐兵數百募勇又數
百卽安徽一省已足竭天下之財而無益於事此已覆之轍不待
臣明言者也見在賊逼桐舒騷駁北竄而各處險要半屬空虛

以爲廬郡以南亟宜勦廬郡以北則宜防防勦並施非多兵不可
安省兵力單弱每因別無可調募勇以濟兵之不足而自正月安
慶告陷以來所招之勇無不見賊立潰鳳陽之勇城陷而隨賊肆
掠舒城之勇戰潰而導賊入城此鄉勇萬不可恃臣所目擊耳聞
者也見在新撫臣江忠源因兵力太單不得不各處募勇江忠源
調度有方且所帶楚勇甚屬得力必能妥爲控馭然此處人情非
如楚勇之嫻訓練而能聯臂指效忠義而可作腹心臣愚不能無
慮竊計勇旣無用兵亦難籌此時武昌解圍楚豫交界可以無警

陝甘督臣舒興阿所帶陝甘兵三千名尙在陳州可以移緩就急來皖應援由陳州府四十里至沙河登舟由沙河入皖直抵六安順流而下一帆可至必得此兵與撫臣會合一處大壯聲勢庶

可以決成功應請旨飭令舒興阿星速帶兵前來庶江忠源得以併力南攻不至以烏合之勇再誤機宜卽謂逆情詭譎難保不復

回武昌楚豫之交未能十分放心然皖省距楚豫皆近亦可就近策應儘舒興阿不能親來亦請飭令派兵二千名前赴皖省交撫

臣江忠源調遣兵力旣厚南路之賊卽可痛加勦擊先取舒桐次復安慶殲除淨盡固爲深幸卽有餘匪逼入長江下流或扼東西梁山要隘閹截或與江揚共議翦除大江東南庶幾有豸不亟圖此而專事設防則失安慶而守桐失桐城而守舒失舒之後六廬交警西北兩路爲之騷然其患詎可勝言況賊已壓境再行四路

催援無論在事文武各有專責勢難去而之他卽聞信卽來而夫
馬耽延亦屬緩不濟急且自桐城既失南北文報梗塞不通江南
安甯徽池太廣五府一州聲息不聞前據探報賊由蕪湖進宣城
之灣沚而窺徽甯由太平廣德逼東境而撲蘇常若果如此蘇浙
危矣此南路之急宜勦而不宜防者也北路水陸要隘各有重兵
駐防而由廬州至宿徐止固鎮有防兵七百臨淮並無一兵臣統
籌大局守固鎮不如守臨淮固鎮僅堵陸路專護宿徐臨淮則水
陸並防兼爲皖豫屏障此前侍郎臣周天爵舍臨守固之未爲得
計也然查臨淮以一河爲阻自應防堵北岸而北岸廬舍蕭條地
形寥廓又非防兵厚集不足聯絡抵禦河臣楊以增旣駐徐州勢
可兼顧應請旨飭下楊以增俟和春蘇布通阿無論何人來徐卽
飭令酌帶兵勇並防守固鎮之兵概赴臨淮則北可捍衛宿徐阻

賊長驅之路西可保障懷蒙遏其竄豫之衝此廬郡以北至要之地與其分而守不若合而防也至安慶克復後各路合兵以防爲勦以勦爲防撫臣江忠源自能相機籌策非臣一時所能豫計也又奏前因捻匪張茂等糾眾數千人在懷遠滋擾當飭遊擊錢朝舉等會合懷遠縣知縣朱鎮團練邵徵祥等分股進剿該遊擊等督帶兵勇行至新集有捻匪二三千人分爲三路來撲我兵亦分爲三隊直前迎擊該逆分股鈔我軍後適該處練勇趕來接應匪勢不支同時潰敗當斃賊百餘名生擒十三名訊據供稱張茂前在懷遠實有七八千人嗣聞官軍前來捕勦陸續逃散是日張茂頭受槍傷首先逃走其餘捻首擊死七八人臣以張茂未經拏獲難保不再行糾聚復飭該文武等分路偵探臣行抵蒙城復就近訪聞均稱張茂在懷鳳一帶結捻已久附和者數十村莊此次受

創贍暴名歸各家冒爲良民練勇既不敢查拏官兵亦未便概行
勦洗且粵匪風聲旣緊人心震動若操之太促則鋌而走險勢必
勾結併歸逆黨該匪等敗竄之餘見既不敢復聚止好暫緩一步
俟南路情形稍定再行斟酌搜拏此次出力員弁兵勇容俟查明
另行保奏又奏臣於十一月初四日聞知粵賊攻陷舒城卽定於
初六日趕赴蒙城次日連接各處官紳稟函蒙懷旣請臣速臨宿
徐亦請臣親到同時接到徐廣縉回信以歸德之兵萬不可撤勢
難赴皖又據徐州鎮臣百勝等咨稱徐州防務緊要減紓青帶勇
往勦不能分赴阜亳各等語是徐廣縉旣不能前來減紓青亦不
能接辦正在焦灼間復據署亳州知州熊英等稟該處捻匪滋蔓
請臣進兵速勦臣以南路軍情旣緊不得不先其所急初七日行
抵蒙城招集該縣紳民並懷遠紳士來臣行營豫備守禦並令兩

縣聯爲一氣互作聲援至宿州尤爲北竄衝要無將無兵空虛已極該州距蒙城百餘里聲息可通臣已飭知州郭世亨號召團練萬人豫爲守護城池分扼要隘之計遇有警信一呼卽至臣隨時察度粵匪情形如將北竄卽趕赴宿州布置固鎮臨淮一路儻業已竄回臣卽折回毫境將太阜積匪以次翦除再由阜陽至六霍一路廓清內患如徐廣縉進駐蒙亳臣卽由蒙懷渡淮而南先將臨淮以上至潁州府一帶沿河積匪清理並於壽鳳等處擇要駐紮期與南北兩路相爲犄角 上諭袁甲三奏縷陳皖省南北兩路情形並酌量駐紮地方各摺片均能按切時勢自應如此辦理逆賊占踞江面無論退出舒城之信尙未確實卽使僅踞桐城北路仍形緊急江忠源病已漸愈聞之甚慰諒可卽日帶兵迎勦徐廣縉已有旨准畱歸德復嚴諭舒興阿自陳州赴皖毋庸折往湖

北該督所帶官兵並郝光甲管帶之兵已有四千餘名果能剋日
前進與江忠源併力合勦當可得力福濟自揚州灣頭赴皖恐需
時日舒興阿之兵必須趕緊前來方不至有誤事機昨復諭令曾
國藩自湖南統帶礮船沿江下擊以備水陸夾攻但不知何時可
以趕到至臨淮固鎮一路單弱情形甚爲可慮楊以增未能卽赴
徐州和春已於初七日過清江浦但未曾詳敘帶兵若干諒因金
陵大營無兵可分之故今欲嚴扼臨淮固鎮不能不就見有兵勇
擇要布置該給事中旣經見及必須專防臨淮卽與該提督妥籌
商辦和州烏江地方見有副都統常清管帶兵九百餘名可否調
歸一處亦著與和春商辦朕前命袁甲三兼顧宿徐見據奏報已
抵蒙城自可就近布置該給事中勦辦捻匪甚爲妥速頗有聲威
其所稱隨時酌量駐紮地方亦非畏葸諉卸徒託空言者可比諒

必能悉心籌畫保障全淮也另摺所稱捻匪勦辦過楚恐其併歸
逆黨自係實在情形然該處徧地皆匪勾結最易急勦則尙知震
懾緩圖則愈肆鳴張見在總兵百勝所撥之勇曾否趕到既有遊
擊大員統帶自可盡力勦辦大股首匪如張茂等要犯萬不可使
之漏網淮濶以上鹽船貨船總須設法通暢近來籌餉極艱不得
已而借撥淮北票鹽實專爲皖餉起見特恐鹽務官員意存畛域
藉口遷延著該給事中咨照福濟楊以增迅速籌運以濟要需將
此由六百里加緊諭令知之○命吳式芬來京以司徒照爲陝西
布政使胡興仁爲四川按察使由川北道遷○予廣西殉難在籍知縣
張秉亮等祭葬世職○庚申諭內閣穆騰額諱齡奏請援案頒給
呼圖克圖敕書印信並賞給管事喇嘛名號等語阿齊圖諾們罕
前因查辦番務出力加恩賞給呼圖克圖名號所有

應得廣衍黃法阿齊圖呼圖克圖敕書印信著准其照案頒給原領之諾們罕印信卽著遇便繳回至該呼圖克圖屬下管事達喇嘛噶勒藏熱布覺爾並著加恩賞給扎薩克喇嘛名號以示優異○諭穆騰額諱齡奏第穆呼圖克圖不守僧規一摺第穆呼圖克圖近來行事不守清規劣蹟昭著旣據喀徵阿齊圖呼圖克圖及噶布倫等查明確實先行拏禁稟請參奏自應嚴切訊究懲辦第穆呼圖克圖阿旺羅布藏吉克美嘉木參及屬下管事扎薩克喇嘛工噶嘉木白所得名號均著先行一併撤退仍飭喀徵阿齊圖呼圖克圖等按款訊明取具確供詳報該大臣等親提秉公研訊據實具奏○諭軍機大臣等據恆春奏見議豫捐鹽課仍請暫停借徵一摺見在軍餉萬分緊急但有可籌之方不妨次第並舉據該撫所奏諭令殷商豫捐鹽課可得二三百萬兩與戶部前議捐

免充商大致相符果能速收實效自可接濟軍需至借徵一節係三省並辦之事該省因有鹽課藉口停辦其餘二省無可措詞者又當如何辦理況該撫明知按年遞推不過早提一忙則督辦當不至費事著該撫督飭司道先將鹽務捐課及勸捐納監事宜迅速籌辦報部聽候撥用一面仍遵前旨妥籌借徵總期並行不悖毋誤要需朕前次諭旨指示甚明該撫悉心體會自能辦有成效毋庸再爲瀆請再京餉待用甚急督省捐輸已有四五十萬兩著即分批趕緊起解於十二月中旬務須全到萬勿遲誤將此由五百里諭令知之○諭張亮基奏督籌德州防堵情形並擬到省料理要務一摺見在山東武定德州等處均關緊要該撫因有藩司崇恩臬司虧恩官並杭州將軍瑞昌帶兵防堵足資守禦遠請回省督理刑錢各務殊屬不知緩急該撫統轄全省責無旁貸何得

安坐省城轉以防勦事宜委之他人況省城團練見有劉源灝等辦理更有何應辦要事重於軍務者邪目下靜海獨流逆匪尙未勦除淨盡南路一帶處處與東省界連設有賊蹤闖入咎將誰諉張亮基接奉此旨著卽出省馳赴德州扼要防堵仍探明何路緊要卽向何路截擊總當統籌兼顧不得株守省垣致誤事機見據江忠源奏報賊由舒城圍撲廬州情形緊急餉需刻不容緩著張亮基於山東無論何款先行籌撥銀五六萬兩卽日派員解赴皖省以濟要需毋得推諉貽誤並將起解日期具奏將此由六百里加緊諭令知之○諭英桂奏遵勸捐輸以濟軍餉一摺近來部庫支絀各省維正之供亦多徵解不齊而各路軍餉需用浩繁不得已議及捐輸藉儲軍實如各封疆大吏果能風示僚屬勸諭有方該紳民等敵愾情殷自無不踊躍捐輸之理茲據該撫奏稱籌辦

捐借並行自應如此辦理但不可徒託空言無裨實用著英桂慎飭所屬務選各地方公正紳耆會同設法勸導一俟集有成數卽行奏請獎敘其捐數較多者加額錫封亦所不吝或力能捐輸不願榮身者卽給予印照事竣如數給還仍准先行請獎惟在該撫實力妥籌認真酌辦以副朕儲備軍需爲民除害之至意見據江忠源奏報賊由舒城圍撲廬州情形緊急餉需刻不容緩著英桂於河南省無論何款先行籌撥銀五六萬兩卽日派員解赴皖省毋得推諉貽誤並將起解日期具奏將此由六百里加緊諭令知之○江忠源奏臣於初四五日病勢漸輕適署撫臣劉裕珍委員齋送安徽巡撫關防蕪湖關防到六安臣卽於初八日祗領任事連日探報賊在舒城補修城垣開窓濠溝閉門堅守臣當畱總兵音德布帶領兵勇一千餘名防守六安臣於初九日力疾帶領

兵勇二千七百餘名自六安兼程前進初十日馳抵廬郡擬先將
廬郡守禦事宜略爲布置卽知會音德布約定時日從六安前進
臣帶領兵勇從廬州前進兩路夾攻仰託聖主威福舒城當不
難克復惟是安省見在萬難措手情形有不能不據實直陳於
君父之前者江南岸上自東流下至蕪湖瀕江數百里賊船隨處
可泊卽隨處可以上岸見在江面梗阻尙難兼顧就江北岸而論
上自望江下迤和州沿江六百餘里防不勝防其中最要之處莫
如東關而玉山與張印塘所帶兵勇僅二千二百名見在廬郡所
恃者僅臣帶來四川兵開化勇廣勇七百餘名及在六安新募之
勇二千名與李鴻章勇六百名劉裕鉉新募之勇數千名且初集
之眾尙須設法教練方能得力此安省兵勇單薄之實在情形也
至於兵餉藩庫絲毫無存東關兵勇已欠發口糧二十餘日臣

帶來銀六萬兩除發給演川開廣各兵勇十一月分口糧及新募各勇半月口糧並置備各勇鍋帳器械已用二萬餘兩外僅存三萬餘兩若將東關兵勇及劉裕鉉等新募之勇口糧全行補給所存已屬無幾而城上守禦器械一切俱無城中米糧又復不足子藥鉛丸俱形短少若欲一一置辦直苦無從措手此安省兵餉匱乏之實在情形也新任臬司既無來皖信息見在尙係已革臬司張印塘署理揀發知府四員僅到陸希湜一員業已委署潁州府篆務廬郡候補知縣僅有數員候補佐雜亦僅有十餘員臣初到任旣未知其能否而應辦之事百端交集直是無員可委此安省乏員之實在情形也夫安徽一省本當賊匪北出之衝見在桐城又復爲賊所踞而無兵無餉無人至於如此臣抵廬一日焦灼萬端然臣受恩深重自當於萬難措手之時力求有濟俟廬郡布置

清定卽當督率兵勇前往攻勦斷不使賊匪北竄一步以仰慰宵
旰憂勞又奏正繕摺間十一日戌刻劉裕珍等派往防守沙河之
勇敗回十二日黎明賊匪大隊徑撲廬郡守城兵勇過單不敷分
布臣力疾激勵將士誓以死守並分別咨調音德布自六安帶兵
赴援玉山張印塘自東關帶兵赴援袁甲三臧紓青自鳳頴帶兵
赴援並懇恩就近飭派大臣統帶兵勇星馳赴廬並由部就近籌
撥餉銀以濟急需上諭該撫所帶僅止兵七百餘名廬州新募
勇亦止二千餘名單弱已極江忠源前次飭令前赴武昌之楚勇
一千餘名湖南兵六百名雲南四川兵未渡江者亦多留守武昌
此項兵勇久隨江忠源歷陣兵將相習湖北省城存兵尙不爲少
而廬州危急萬分稍有疏虞致賊北竄所關非細著吳文鎔崇綸
迅飭原帶此項兵勇之都司戴文蘭並備弁人等趕緊將江忠源

原帶兵勇全數帶赴廬州聽候調遣萬勿遲誤其黃州逆匪責成
唐樹義實力追剿勿得株守省垣藉詞諉卻將此由六百里加緊
諭令知之○諭江忠源奏賊撲廬州郡城危急等語袁甲三駐繁
蒙城距廬郡不遠見在該郡兵勇甚單情形緊急著該給事中酌
量帶兵前往協剿並兼顧北路不令該匪乘虛上竄迅卽妥籌辦
理將此由六百里加緊諭令知之○諭本日據張芾奏請畱借協
解滇黔兵餉及銅鉛本銀以資善後一摺該撫止知有一江西而
應解應撥款項竟敢不遵諭旨任意截畱置全局於不顧已於摺
內嚴切批示矣茲又據江忠源奏稱前飭江西撥解銅本項下銀
僅能撥銀二萬兩等語此項銀兩疊經降旨嚴催該撫乃置若罔
聞於事勢緩急輕重全無審度見在該省自舒桐二城失事後廬

郡情形危在呼吸是該省之需餉緊急視江西之豫備善後孰輕孰重著張芾於接奉此旨後迅卽提款派委妥員務將前項銀十萬兩全數撥解無分晝夜兼程前進以濟急需無得藉口遲延致干重咎將此由六百里加緊諭令知之○諭據和春奏行抵徐州統兵防勦一摺前因怡良奏鎮江軍務須一手辦理降旨准令和春折回惟見在皖省警急宿徐甚關緊要和春業已到徐著毋庸折回鎮江卽知會向榮怡良等一體遵照本日據江忠源馳奏逆匪直撲廬郡該處情形萬分緊急著和春卽日酌帶兵勇兼程馳赴廬州會同江忠源等合力攻勦毋稍延誤至所稱擬咨向榮酌派得力官兵一千名星馳來徐以備攻勦著卽飛速咨調惟廬城危急若待江南兵到再行赴援已屬無及見在舒興阿統帶陝甘官兵四千餘名計日可抵廬郡該提督卽可與舒興阿酌量調撥

總以急援廬州遏賊北竄爲要將此由六百里加緊諭令知之○江西巡撫張芾奏請將應解滇黔兵餉酌畱借濟軍需得旨戶部速議具奏屢次嚴催不准截畱何不知緩急置全局於不顧實堪痛恨汝自抵任以來止知有一江西款項則任意截畱保奏則太覺冗濫一籌莫展專以奉承大紳矜爲務昧良喪心至於此極朕自愧用汝之庸愚大吏實覺厚顏但不知汝能汗流浹背否又奏革督程商采捐銀六萬兩代懇加恩批朕以蒼生爲重餘非所繫念者所請著仍不准行其先繳之款及未繳之款著一併擲還○山東巡撫張亮基奏飭各屬添募壯丁籌辦軍械情形得旨團練原爲各守鄉閭練勇亦止能補兵之不逮若事事作正開銷何有如是多款著設法變通以免日後駁飭○予安徽舒城殉節主事朱麟祺祭葬世職○辛酉諭軍機大臣等勝保奏連日攻勦情形

一摺此次進剿雖有斬擒我兵亦受傷不少且限於地勢仍未能
直入賊壘朕日望捷音實深焦灼見據獨流難民供稱賊營糧米
粢草將斷匪眾離怨正可乘機密派妥人潛入賊壘設法離間賊
情誑誘其逃出難民亦難保無奸匪溷迹務須加意查察勿墮詭
計靜海西南一帶蘊秀帶兵在彼駐紮能否得力朕甚不放心西
凌阿善祿等移營高阜去靜海較遠且與該大臣營盤隔絕聲勢
未能聯絡深恐有誤事機均著該大臣體察情形酌量布置務使
聲息相通聯爲一氣攻剿方可得手所請山東巡撫派兵協堵一
節見在東省防堵緊要兵力較單不敷分撥本日已令瑞麟帶領
前鋒等營兵一千名前往軍營卽由該大臣節制應於何處堵截
卽著兩量調度再瑞昌帶兵一千名見在移營德州並著隨時知
照扼要防堵另片奏派員召募川勇等情均著照辦刑部主事楊

黑兒由四川原籍募勇五百名擬赴河南直隸軍營投效據裕瑞
奏該員已於九月十八日行抵新都卽著勝保提催來營當可得
力將此由六百里加緊諭令知之○向榮奏高湏賊匪遠遁並鎮
江裹脰情形得旨余萬清尙知愧奮著激勵進攻迅破鎮江爲要
至江南情形如此鋪張總未克復汝尙有何面目自誇也○尙書
銜前任禮部侍郎杜塈九十生辰賞加太傅銜並花翎○追賞安
徽殉節侍郎呂賢基銀三千兩治喪並於舒城建祠○壬戌諭內
閣前因巡防王大臣等奏請推廣鑄造大錢當交戶部議奏茲據
該部查照王大臣等所議當千大錢以重二兩爲率以次酌量遞
減期於輕重相權便民利用著卽照部議所有當千當五百大錢
均用淨銅鑄造務使磨鎔精工色澤光潤當百當五十當十當五
大錢亦須配鑄精良一律完整與制錢相輔而行俾民間咸知寶

貴便於行用儻製造稍有粗率僉減著錢法堂侍郎卽將鑄匠人等嚴行究辦該管監督大使各官一併嚴參並著該部通行各直省督撫均照此次所定分兩一體鑄造以歸畫一其民間應納稅課錢文等項均照部議准以大錢交納其應交銀者並准其按照制錢兩串折銀一兩之數抵交總期上下相信出入均平如有私鑄及奸商居奇阻撓者均按例治以應得之罪○戶部右侍郎王茂蔭奏陳大錢利弊得旨巡防王大臣會同戶部密議具奏蓋大錢之暢行與否全視在上之信與不信果能設法豫籌爲經久之計不先自壞成法斷無隔閡之理據該侍郎所奏作奸犯科今人甚於古人足徵今日非昔時可比況經營之巧今人亦甚於古人見今大錢初行卽過慮後時雖爲謀國久裕之計獨不計及朝堂聚議小民更增疑也但亦老成之見王等不可先存成見秉公定

議○陝甘總督舒興阿奏報赴皖會剿起程日期得旨已有旨催汝速赴安徽見在廬郡已經被圍汝若緩緩由水路進發必致貽誤機宜豈能事事妥當方可前進今歲秋勝保自晉省追賊至直沿路並無車馬口糧該大臣與兵丁同食野菜纔將將趕上亦由該大臣素得民心之故汝由樞臣外任兼圻厯練有年緩急應曉豈反不如一勝保邪朕甚爲汝愧天下大患胥因循觀望之所致朕爲天下主旣失之於前悔已無及豈復忍不挽之於後時時加嚴隱忍姑息朕豈肯爲總以不誤兵機能知緩急兼能奮勇殺賊者是賴若一無用之輩雖畱之亦無益國法豈能倖逃憲之○予福建陣亡參將瑞文等祭葬世職○癸亥諭軍機大臣等軍機大臣奏據章京陳鴻翊呈稱獨流賊營東西北三面均難進攻惟南面王家營隄勢高出獨流之上施礮較能得力若得此村則獨流

卽在掌握等語著勝保察度情形妥速籌辦原呈著鈔給閱看又據光祿寺卿宋晉奏磁州知州恩符最善營謀向隨訥爾經額終年奔走並不在本任辦事前從臨洺關逃出謾解訥爾經額到京後復投至勝保營中謀充翼長似此庸鄙之員必不能有裨軍務等語著勝保密行訪查儻該員實有營謀奔競劣蹟卽著嚴參如尙無前項情弊卽著飭令回任將此由六百里諭令知之○琦善等奏查瓜州援揚之賊在運河西岸築立土城數處意欲近逼三漢河與儀徵之賊爲犄角之勢臣等公商必須注以全力方能制勝臣琦善遂於初十日親往三汊河與瞿騰龍先期布置十一日黎明晉康查文經自東面陳家巷帶勇赴三汊河臣慧成添派弁兵臣雷以誠亦遣張翊國帶勇協勦瞿騰龍德興阿率帶弁兵會同河東兵勇由高明寺搭橋過河分三路前進游擊安勇等亦由

東路溝港鋪板直撲賊營該逆大股出巢抵死抗拒瞿騰龍督率
弁兵奮勇衝殺擊斃手執大黃旗賊目一名賊始敗退我兵乘勢
追至賊巢燬其所踞窩棚數處殲斃賊匪及焚溺死者無算是日
已刻城內之賊由南門撲出數千名分路衝突副都統薩炳阿副
將松齡由南路分兩翼襲鈔賊始大敗其自南門分股西趨之賊
經參將鞠殿華等分隊迎擊斃賊百餘名餘匪悉退入城至儀徵
之賊雖屢挫其鋒該匪仍敢由儀徵河之樸樹灣南岸建立土城
數處並過河占踞臨河之隆覺寺等處臣琦善遂由三汊河繞越
二十餘里於十三日五鼓督率瞿騰龍德興阿等潛師前往十四
日黎明踰溝直逼樸樹灣北岸賊營賊匪大驚死守不出官兵佯
爲撤隊而設伏於高岡之後以待賊果大股出巢來追迨深入伏
中馬步隊齊出擊之賊隊遂亂官兵乘勢追殺將賊匪盤踞之窩

巢燒毀數十處殺斃賊匪七八百名焚溺死者不計其數臣等伏查瓜州通江之河向分三道中路一道爲瓜州河分東西兩岸西路一道爲儀徵河分南北兩岸東路一道爲揚州運河今賊已踞其二復會合南京鎮江瓜州各路之賊由兩河分路齊進賊船不下數千隻儀徵北門復有山路可直達揚城西北以襲我兵後路而官兵除傷病不滿一萬各路防勦實覺應接不暇當此萬分喫緊之際惟有激勵將士竭力堵禦再十五六日三汊河等處賊匪竄擾甚急接仗情形另行續奏上諭該大臣等任令逆賊占踞揚城復又將儀徵失陷逆燄彼猖愈甚而我軍日事遷延此次兜截來援之賊雖經疊獲勝仗而內竄之賊未能併力殲除若不急圖攻克致令儀徵瓜州匪眾合夥救援揚城攻勦更難得手所稱三汊河等處賊匪竄擾甚急續將接仗情形查奏等語該大臣

係於十六日發報何以不將見在接仗大概情形附奏實深懸繫
另片奏哲克東阿張守仁與協領佐領似已全歿行間究係如何
陣亡著卽詳細查明請卹德崇額忠泰穆克登額等所帶馬隊俱
係勁旅見在何處勦賊琦善屢次奏報摺內何以俱未敘及此時
福濟業已赴皖廬州一帶賊勢緊急該大臣等圍攻揚城頓兵日
久坐視江北賊勢蔓延徒以隱憂不能兼顧爲詞不知統兵大帥
所司何事將此由六百里加緊諭令知之○甲子江忠源奏查廬
郡南臨大江北枕淮水爲自古形勝之區見在金陵揚鎮三城未
復又爲賊匪北出之衝周城七門惟南門得勝門外向無房屋水
西門外房屋尙少餘俱民房櫛比臣到任卽出示毀拆尙未興工
賊已踵至盤踞各民房內施放槍礮又水西一門城牆最低而城
外陂隴獨高賊紮營其上俯瞰城中最爲喫重臣卽駐守其處將

城牆加高培厚其次大西門民房偏近城根又無濠溝賊到卽在該處開空地道經隨臣來安之湖南舉人鄒漢勛訓導鄒台郁駐

守雇覓夫役從內迎掘惟城垣周圍三十餘里兵不滿三百勇不足五千且係新集之眾不諳守城規矩雖將臣帶來兵勇數百分布各城而爲數無多究不敷用幸城內紳民深明大義見臣力疾登陴部署一切人人感激奮興出丁助守且設局分段送飯送粥送茶晝夜不絕兵勇無須舉火得以專意守塚賊於十三日五更用槍礮分攻得勝大東小東及南北二門暗用雲梯爬大西門月城經鄒漢勛督率兵勇抵禦斃賊十餘名賊猶抵死不退業有數十名爬上月城被我兵奮力殺斃奪獲大黃旗一面雲梯六架其餘各門亦各斃賊十餘名是日合計斃賊一百四五十名十四日黎明賊乘大霧猛攻北門經張文斌會同把總尹孝忠外委張得

貴督率武生周恩等奮力抵禦斃賊四五十名尹孝忠腹受礮傷移時身故張得貴右肩中槍子傷猶力禦不退右手復受礮傷三指俱斷賊來愈猛周恩父子督率眾勇拌死抵敵賊始敗退同時賊又乘霧分撲小東門知府陳源兗督率守備程智泉力禦斃賊二十餘名是日合計斃賊六七十名十五日卯初賊以小股分攻六門以大股用雲梯攻得勝門經都司楊煥章督率四川弁兵奮力抵禦把總尙得勝帶勇幫同轟擊自卯至辰斃賊百餘名奪獲雲梯五十餘架各門斃賊七八十名是日合計斃賊二百餘名此連日賊匪攻城我兵疊獲勝仗之實情也所有傷亡兵民均由臣隨時分別賞恤其尹孝忠一員應請旨交部從優議卹惟是守城數日以來雖屢獲勝兵勇究屬過單軍餉究屬過絀伏乞恩旨就近迅調援兵多撥軍餉星速救援保全廬郡卽以遏賊北竄之路

臣厯守廣西湖南江西各城紳民急公好義固不乏人求如廬郡之萬眾一心實所未見良由涵濡聖澤淪肌浹髓故能有勇知方眾志成城除俟事竣由臣擇尤保奏外應請旨先行下詔嘉獎以勵眾心抑臣更有請者臣甫經到任賊卽圍城又值萬難抑予之時非賞罰嚴明不能整齊眾志如有出力尤著之員可否由臣隨時保獎其不遵調度之員並由臣隨時正法伏候訓示遵行上諭內閣逆匪自竄擾舒城以後突於十一月十二日大股直撲廬州該撫江忠源於先期一日趕抵郡城力疾登陴分門布置城內紳民亦各出丁助守屢獲大勝破其詭計賊膽已落城守愈堅江忠源自廣西湖南轉戰經年所至有功本年防守江西省城轉危爲安今逆賊突撲廬州該撫以病軀督戰卽能屢挫兇鋒士皆用命洵屬忠勇可嘉並據江忠源奏廬郡紳民萬眾一心同仇敵

懷爲各省所未見尤堪嘉尚著該撫先行傳旨褒獎事竣據實保奏朕必破格施恩湖南外委張得貴肩受槍傷敵斷三指猶能力戰殺賊武生周恩父子帶勇拌死禦賊均屬奮勇出眾所有在事文武有能似此出力尤著者卽著隨時保奏其有不遵調度畏葸貽誤者卽著隨時正法總期信賞必罰以振軍威所有湖北把總尹孝忠防守北門中礮陣亡實堪憫惻著交部從優議卹○諭軍機大臣等據袁甲三奏廬郡危急必應四路赴援並聞舒興阿帶兵由太阜前進水路卽走正陽關陸路距關止數十里請飭該督酌畱將兵駐守正陽關以防逆匪北竄等語舒興阿前奏分帶馬步官兵於十五六日啟程赴皖計已早過潁州此項官兵幾及五千名水陸並進聲勢甚壯著卽酌量分撥數百名派委得力將弁統帶馳往正陽關扼守儻廬州賊匪被勦由六安北擾正陽卽著

竭力迎擊如令該逆過關一步卽將扼守該處之領兵鎮將以軍法從事該督仍親督官兵兼程前進速援廬州不得因車馬船隻不齊再事遷延總期設法遄行毋誤兵機爲要和春見在徐州已有旨令其前進該督所帶之兵即可分撥交其統帶剿賊和春熟悉賊情屢經戰陣必可得力郝光甲屢次逗遛規避甚不足恃該督若將兵丁全行交伊管帶恐有貽誤著隨時查察如仍畏葸不前卽行奏明將該革員正法毋稍瞻徇懷之將此由六百里加緊諭令知之○諭據江忠源奏廬郡擊賊連日獲勝情形皖省兵力單弱前已飛諭吳文鎔等酌撥存楚兵勇交戴文蘭星馳赴援舒興阿所帶官兵四千九百餘名由陳州水路啟程赴皖本日復諭催兼程前進諒不日即可趕到得此生力軍與該撫會合攻剿必可得手至應如何布置如何調遣之處卽著江忠源會同舒興阿

協力籌辦務將圍攻廬郡之賊先行盡數撲滅則分踞桐舒二城之匪亦必間風喪膽該撫移兵南勦即可次第殲除所稱該郡紳民萬眾一心洵足爲長城之倚並著該撫隨時激勵以固其志至江西省應撥解銀十萬兩節經嚴催星速解皖復飭河南山東兩省無論何款先行籌解數萬兩以應急需卽著該撫派委委員分投迎提以期迅速解到又廣東省有解交部庫銀十五萬兩此時如行抵皖境亦准該撫截留數萬兩備用將此由六百里加緊諭令知之○諭袁甲三奏：催舒興阿赴援廬郡並趕赴宿州籌辦防勦一摺此時廬州被圍緊急雖據江忠源奏十三十四十五等日疊獲勝仗而賊匪大隊尙復盤踞城外音德布見在六安玉山見在東關常清見在和州所帶之兵是否抵郡該撫摺內均未聲敘昨已諭和春由徐州前進想亦卽日啟程該給事中與和春旣

已熟商所慮宿徐臨淮緊要之處卽著妥爲布置不可疏虞木日復有旨飛催舒興阿兼程赴援並令將所帶之兵酌量分給和春統帶朕思和春久厯戎行且能熟悉賊情必可得力況由徐州前進本係迎頭廝殺既可力解城圍並可杜賊北竄至蒙亳一帶亦關緊要徐廣縉若遽離歸德恐豫省門戶無人堵禦該給事中前奏令趙昀前赴舒城該員見在何處即可責令帶勇專防蒙亳一帶鈐制土匪與該給事中聲勢聯絡至所稱正陽關應畱兵駐守等語亦諭知舒興阿照辦矣將此由六百里加緊諭令知之○釋鑑禁已革安徽布政使李本仁交江忠源差遣○乙丑諭內閣前有旨令戶部製造錢鈔與官票銀錢並行頒發中外酌定章程具奏茲據該部覈擬條款開單呈覽並遵議克勤郡王慶惠奏請推廣鈔法一摺朕惟比年以來銀價日昂民生愈困小民輸納稅課

每苦於銀貴而轉運制錢又多未便朕屢念民依恫瘝在抱酌古
準今定爲官票寶鈔以濟銀錢之不足務使天下通行以期便民
裕國著照部議凡民間完納地丁錢糧關稅鹽課及一切交官解
部協撥等款均准以官票寶鈔五成爲率官票銀一兩抵制錢二
千寶鈔二千抵銀一兩與見行大錢制錢相輔而行其餘仍交納
實銀以資周轉京外各庫應放之項官票寶鈔亦以五成爲限如
此明定章程權衡出納行之日久中外俱可流通總期官民交益
上下相孚並准五城殷實鋪商具結承領寶鈔俾民間自行通用
卽由五城御史隨時支發驗收並著步軍統領衙門認真稽查如
有僞造等弊卽行按例治罪其有意阻撓不肯行使者以違制論
地方官奉行不力者嚴參懲辦此旨並奏定章程著該部通行各
直省督撫等刊刻宣示一律遵行○諭軍機大臣等前因上海尙

未收復當經諭令怡良許乃剗將明年海運事宜迅卽妥籌不得藉詞貽誤見尙未據覆奏殊深繫念茲據戶部奏稱蘇省新漕海運亟應先事豫籌等語漕糧正供京糈支放攸關豈容稍有貽誤若能將上海賊匪計日殲除則海運事宜自可循照舊章次第辦理刻下已屆隆冬上海尙未收復漕運須於年內趕辦該督撫務卽設法妥籌按照該部所議悉心酌度毋得稍有遲延仍著嚴飭帶兵文武各員迅卽激勵將士勸諭紳民合力同心克復上海則轉運漕糧自無庸多費周章諒該督撫等必能體察情形豫爲籌畫以慰朕念戶部摺著鈔給閱看將此由六百里諭令知之○諭戶部奏請飭奉天江浙等省招商運米等語奉天江浙等省招商買米歷經辦有成案見在軍務未竣未便遽議採買而畿輔米穀最關緊要自應廣爲招徠著盛京將軍奉天府尹兩江閩浙總

督江蘇浙江巡撫查照成案出示曉諭各該米商聽其自行運米至天津售賣每船八成載米二成載貨並回空船料均准一律免稅並著直隸總督轉飭天津鎮道嚴切曉諭遇有米商到境不准胥吏需索市僧居奇以通商販而裕民食原片著鈔給閱看將此由五百里各諭令知之○丙寅盛京將軍奕興等奏報辦理盜犯情形得旨奕興等辦理此案尙屬認真毫無外省開脫習氣嗣後奉旨匪徒有情法難宥者均著卽行就地正法庶可稍知儆懼朕斷非先存加嚴之成見第時勢所迫不得不然莠者除之不嚴良者何由待安汝等想必深明是理○工部侍郎奕毓卒予祭葬賞銀五百兩治喪○丁卯以孝德皇后升祔 奉先殿 上親詣祭告○勝保奏臣接慶祺密函獨流西北有水之處近日冰凍將堅城營防範稍疏易於攻撲臣以進攻地勢非親往相度不可遂

帶小隊百人坐冰牀前赴西北面積水處所詳視地勢折回慶祺營中面商機宜繞至第六鋪地方忽聞東南連環槍礮知係我兵開仗南岸料有德勒克色楞並達洪阿督陣必可抵禦惟北岸兵力稍單恐賊由此而出馳馬先赴北岸我兵果被大股賊匪圍繞臣卽督小隊百餘人用連環槍礮緊追轟擊先斃執旗賊目四五人又擊倒長髮賊三四十名賊勢潰退臣正在催兵掩殺遙望南岸我兵已早開仗且聞神威礮連環攻擊見黃旗紛倒賊屍填積料獲大勝正可乘勢兩岸夾擊嗣因南岸撤隊太速該匪用噴筒火彈復行撲出我兵自相擾亂恐有疏失而爲河所阻又無船隻未能飛越萬分憤急幸北岸逆眾已奔回土壘臣卽由浮橋渡南岸大營維時賊匪已退入木城詳查我兵何故退回據各營將士面稟是日午刻忽見賊壘擁出二三千人分三路撲來我兵奮力

迎擊斃賊無數申刻逆眾傾巢盡出我兵亦分投掩殺賊順南隄而逃副都統佟鑑用礮轟擊黃旗紛倒隄面賊屍填積約斃四五百名逆眾未能入壘其勢已慌南北兩面又有知府朱鎮知縣謝子澄帶勇追殺該逆沿隄上下狂奔窘蹙萬狀佟鑑見賊勢大潰飛馬親赴濠邊欲拽賊營搭濠板片斷賊歸路隨行兵丁不過三百名該逆猝死從佟鑑背後衝去將我兵分爲兩截佟鑑到岸卽飭兵丁併力拔取板片不意爲冰所膠急不能拔親自下馬督拽足滑而踏賊眾蠭擁來刺朱鎮謝子澄遙見佟鑑被困危急不及督勇策馬赴前救護謝子澄卽與佟鑑同時陣亡朱鎮亦受槍傷幸大隊官兵繼至賊眾奪橋奔回僅將朱鎮扶救回營而護駁官兵及拉礮丁夫被衝失散達洪阿所督北路健銳火器兩營官兵離壘北最近收隊時先行退下全隊兵勇亦遂掣動逆匪復從

壘中悉數撲出德勒克色楞急督吉林馬隊蒙古各兵極力抵禦
又經臣從河北督放槍礮始將賊匪擊回而鍵銳火器兩營兵丁
仍復奔回不能列隊以致二品大員陣亡四百斤神威礮八尊遺
失一半臣甫離營半日未經臨陣指揮大捷之餘遇此失控達洪
阿久歷戎行所帶皆京旗勁旅隨臣打仗已非一次於一切調度
機宜諒能略曉乃始以貪功銳進繼以輕退失機致該逆萬分窮
蹙之餘又張兇燄除將首先退回之官兵令達洪阿查明一律正
法外達洪阿銳進輕退請旨先行摘去頂帶仍交部嚴加議處責
令帶兵自效臣勝保臣德勒克色楞有統帶幫辦之責咎俱難辭
應一併仰懇飭部嚴議又奏副都統佟鑑自管帶礮位到營每次
隨臣進攻奮往向前不意此次親至濠邊拽取濠板斷賊歸路竟
爲逆匪擁圍身受重傷陣亡忠勇血誠深堪憫惻查該員上有老

母八十餘歲下無子嗣懇恩飭部從優議卹並飭該旗查明近支有無可以承嗣之人具奏以慰忠魂又知府用天津縣知縣謝子澄前次禦賊保衛津城自調赴軍營帶勇殺賊無不勇往爭先今見佟鑑失陷策馬赴援身受七傷捐軀致命倍深痛惜應一併請旨飭部從優議卹候選知府朱鎮亦因佟鑑危急單騎馳救以致膀受槍傷甚重至今槍子未出查該員以文員帶勇屢次奮勇打仗今不避危險身受重傷實屬勇往出力爲軍營中不可多得之員可否懇恩以道員歸部選用並賞戴花翎之處出自 聖裁

上諭內閣此次南岸失利雖因達洪阿銳進輕退以致挫衄勝保身爲統帥各營皆歸節制何以離營半日卽致將士不遵調度輕率進兵平日所稱號令嚴明者何在德勒克色楞係幫辦大員不能督率約束咎亦難辭勝保德勒克色楞均著降四級畱任拔去

花餉以示薄懲達洪阿與賊接仗已非一次豈不能深悉賊情乃
姑以貪功銳進繼以輕退失機尤堪痛恨著卽行革職仍交勝保
遺令戴罪自效如再不知奮勉卽於軍前正法該革員家產並著
查封候旨辦理○諭軍機大臣等羅惇衍奏粵東官屯可變價改
作民田以濟軍餉並酌擬條款開單呈覽一摺廣東南海等縣瀕
海間田歸作官屯者其有一千九百餘頃據稱變價出售每畝可
取銀十兩統計可得銀一百九十餘萬兩等語見在軍營需餉浩
繁各省大吏無不竭力圖維但使有益於國計無病於民生自當
設法籌備以濟要需著葉名琛柏貴按照該侍郎所奏並變價事
宜十二條悉心體察情形如果可行卽著據實具奏酌量辦理並
保舉該省公正紳士令其設局專辦不假吏胥之手總期於公事
有益不至擾累民間別生事端爲要原摺單均著鈔給閱看將此

由五百里諭令知之○諭勝保奏獨流南岸接仗失利並副都統
知縣陣亡等情各摺片覽奏憤懣之至該大臣統帶全軍於諸將
進退機宜不能先期調度以致損折大員傷亡府縣各官實堪痛
惜計攻勦獨流靜海而月以來日盼殄除該逆以定畿輔人心不
料有此敗衄轉令逆燄彼猖殊失朕望朕因將才難得姑予薄譴
勝保等若不將此股逆匪全行撲滅何足以贖愆尤所有德勒克
色楞原帶之東三盟兵丁已諭知僧格林沁速撥數百名飭赴勝
保大營交該貝子統帶以資攻擊該大臣卽熟籌布置西北面積
水處所如果冰凌堅實可以設法進攻不得坐失機宜慶祺營中
兵力是否足敷勦辦直隸藩司楊霈見在該侍郎營中該員辦事
向來結實帶兵聞亦勇往應如何量加激勵俾該員得盡所長著
勝保隨時酌量調遣天津練勇素稱矯捷謝子澄旣經陣亡恐該

勇等無人統束或致四散該大臣請飭文謙赴營接辦著卽傳諭
該鹽政迅赴軍營並酌帶壯勇前往庶期指揮得力其謝子澄前
帶各勇亦著文謙收集統帶該鹽政係特派天津防勦大員素得
該處士民之心該大臣務當推誠相與藉資臂助達洪阿係棄瑕
錄用之員此次大損軍威實堪痛恨已有旨將該員革職家產查
封仍令戴罪自效若再不遵調度失機貽誤國法豈容倖逃著該
大臣傳知各營以後進勦事宜無論何員貽誤卽以軍法從事前
據許乃普奏勝保軍營有曾經保舉同知銜以知縣用之安徽方
姓於營中賞罰頗有招搖糧臺支放亦多冒濫等語著該大臣查
明方姓何人如何招搖冒濫之處卽行據實參奏不得稍有回護
軍營委員若恩符等又何必勉強畱用致招物議代人受過也將
此由六百里加緊諭知勝保並諭令德勒克色楞知之○湖北巡

撫崇綸奏見在賊船由黃州府竄往樊口分股又赴華容新店各
村鎮四出焚掠臣屢勸督臣派兵攻剿督臣之意必待湖南兩廣
並自造各船礮到齊方可出師若以數千之旅惟恐有失萬不肖
行終日閉城坐守查省中見有兵勇一萬數千名除守城及繁營
附城要隘外尚有數千可以出征若待湖南兩廣各船礮到齊道
路迢遙深恐有需時日況賊匪大股多赴安徽見在楚境者俱係
零星小醜並有土匪冒名搶劫長髮老賊實係無多若派數千官
兵配以見有礮船水陸夾擊足資痛剿且聞賊匪見在田鎮築壘
若果日久盤踞則商賈不通驛路梗塞爲患滋深臣思荊州將軍
台湧兼署提篆統轄滿漢官兵見賊在下游荆襄安謐當已函致
該將軍仍帶前調滿兵二千名來省會商如肯帶領前來先就見
成破船水陸並征否則臣卽前去或兩人同往與其株守一方莫

如殺賊救民最爲目前要著臣日夜籌思萬分焦灼以致病勢較重仰懇天恩暫准賞假調理上諭前據台湧奏稱應否統兵赴援請旨遵行一摺朕詳閱所奏先後接據吳文鎔崇綸函咨一則令其帶兵赴省一則令其不必來省是該督撫各執一詞意見已屬兩歧茲據崇綸奏力籌勦賊各情並稱吳文鎔閉城坐守等語朕以吳文鎔老成練達見當楚北逆氛未靖一切籌防籌勦堪資倚任詎該督一味株守不圖前進竟置大局於不問是誠何心試思賊情緊急又豈安坐衙齋所能了事崇綸與吳文鎔辦事一方應如何協力同心迅圖攻剿乃遇事齟齬先已不能和衷又安望其於事有濟儻因各懷已見致誤事機該督撫等厥罪惟均朕斷不能爲之曲宥見旣據稱該逆於田鎮築壘紮營顯有負嵎抗拒情事其巴河一帶賊船蟻聚尙多分踞黃州之賊亦復不少臬

司唐樹義曾否遵旨前往設法兜剿著吳文鎔一面嚴飭該臬司
迅圖剿洗一面親督官軍出省督戰並察看何路緊要卽馳往何
路裁勦不准以守候船礮造齊致滋延誤所有省城防守事宜卽
著責成崇綸妥籌布置儻有疏虞亦必重治其罪決不寬貸台湧
前選滿漢官兵應否飭令帶赴下游會合追擊並著該督撫會商
兼顧不得各執己見貽誤事機懷之崇綸因病請假著卽賞假十
日調理一切防勦要務仍當盡心籌畫毋稍諉卸將此由六百里
加緊諭令知之○吏部奏遵議在京司官在外道府以下等官辦
理事件失察自行檢舉應否於具題時請旨寬免及照舊減等議
結得旨在京司員處分事無多著卽遵照此次諭旨將可否寬免
之處聲明請旨至外省道府以下等官著照舊例減等議結著爲
例○贈直隸獨流陣亡副都統佟鑑將軍予祭葬世職如將軍例

謚剛節入祀昭忠祠贈升用知府謝子澄布政使銜予祭葬世職
如布政使例謚忠愍建祠原籍均於陣亡地方建立專祠賞救援
受傷知府朱鎮花翎以道員用○以巡查守衛出力賞京旗各營
兵一月錢糧○戊辰諭內閣侍讀學士德奎奏請查收旗戶絕產
一摺國家制用自有常經卽因度支短絀偶有變通亦必下順輿
情上崇國體至八旗官員兵丁皆蒙列祖列宗深仁厚澤得
以蕃衍至今卽有本身物故並無子嗣之員例得承繼近支列入
冊檔永沐朝廷雨露之恩德奎係滿洲世僕豈竟茫無所知乃請
將旗戶絕產盡數查收以充軍餉不知是何肺腑且謂八旗故員
之家坐擁厚貲俱經侍妾家奴把持蕩費以致絕嗣不能報效尤
不成話該員不識政體信口妄言荒謬糊塗實出情理之外著傳
旨嚴行申飭原摺還○諭戶部奏部庫歲需銀兩請改歸冬撥

案內辦理一招向來戶部歲需京餉例於各省春秋撥冊內隨時奏撥解部近年以來各省經部指撥之款每因起解不時以致部庫時形支絀自應先期籌畫以濟要需所有該部歲撥京餉著准其自本年爲始歸入冬撥案內與各直省協撥兵餉一律酌撥仍將冬撥題本改爲專摺具奏俾免遲誤各該省督撫於部撥款項無論京餉外餉均宜照數起解儻有藉詞截畱及率請改撥者著戶部隨時查覈據寶參奏○諭軍機大臣等羅繞典等奏緬甸國貢使入京請變通辦理一招朕念緬甸國王久列藩封該貢使等遠道輸誠真徵忱悃惟見在粵匪未盡殲除該國貢使向由貴州湖南湖北取道進京若令繞道行走殊非所以示體恤卽著該督撫傳旨該使臣等此次無庸來京仍優予犒賞委員妥爲護送先行回國貢物象隻卽行賞收一俟道路肅清卽由該督撫派員送

某其應行頒賞該國王及正副使臣等銀物仍由該衙門照辦齊
全發交該省派員齎送出關轉交祇領如此量爲變通旣無虞跋
涉之勞益足示懷柔之意該督撫卽將朕意宣諭該國使臣遵照
辦理將此由五百里諭令知之○己巳諭內閣奕興奏奉天搶劫
案件請仍照舊例辦理等語搶劫巨案定例綦嚴自道光年間有
奉天匪徒搶奪分別治罪專條以致該地方辦理此等重案不復
援引舊例該犯等恃無重罪結夥橫行日甚一日若僅照首犯擬
斬從犯概行發遣之條實不足以儆兇暴而安善良該將軍所奏
與朕前次批示適相符合嗣後奉天地方凡遇匪徒糾搶之案著
仍照舊例不論人數多寡曾否傷人但有執持鳥槍搶奪財物者
卽應不分首從問擬斬決梟示著爲令○諭刑部奏訊明已革參
將各情請旨辦理一摺已革湖南岳州參將阿克東阿於賊未臨

城先自逃散以致郡城失守罪實難辭乃逃至武昌後主使兵丁
李廷徵捏報殉難復親自裝點棺殮種種狡詐實出情理之外及
至解送到部猶敢嘵嘵置辯堅不承招既據該部訊明供證確鑿
自應明正典刑以伸國法阿克東阿著仍遵前旨卽行處斬○諭
軍機大臣等前因官兵失利降旨將勝保拔去花翎降四級留任
以示薄懲朕思逆匪渡河北竄勝保督兵追勦屢著戰功懷慶解
圍之後特授爲欽差大臣各路官兵均歸節制迨逆匪由山西竄
擾直隸該大臣跟蹤追勦倍歷艱辛朕以勝保調度合宜必能殄
茲醜類是以疊沛恩施專心委任卽該大臣陳奏事件亦必開誠
布公曲加訓諭朕待勝保恩義不爲不厚倚畀不爲不專該大臣
中夜捫心亦當知感知懼加倍小心乃自逆匪占踞獨流靜海後
屢閱奏報詞氣矜張漸有自滿之意前此我兵誤陷冰坑致多損

折此次接仗竟至大員陣亡遺失礮位該大臣雖前赴慶祝軍營相度地勢獨不思身爲統帥離營之時何竟毫無布置達洪阿輕退失機固屬罪無可逭而勝保不能先事豫籌亦可概見及至失事轉以離營他往諉過於人又何以折服將士之心爲大將者必當虛心集益謀出萬全使將士人人用命感奮圖功若私心自用不聽人言以致眾心渙散不肯出力或偏聽幕客傳述之言或濫開委員逢迎之路致有貽誤其慮何可勝言勝保經此次訓諭之後若能返躬省過與幫辦軍務德勒克色楞等及諸將士合力同心剋期勦除逆匪不但盡贖前愆仍可渥膺懋賞儻遷延日久糜帑無功是勝保不能承受朕恩國法豈能寬宥德勒克色楞係幫辦大員與勝保共辦一事責無旁貸汝二人尤當知無不言和衷共濟達洪阿究係勇將此次加以薄懲正望其奮勉立功再邀恩

眷朕賞功罰罪一秉至公惟視汝等自取何如耳憮之慎之見在
進勦事宜如何布置賊匪有無竄逸著卽迅速奏聞以慰朕念將
此由六百里諭知勝保並諭德勒克色楞知之○諭本日據駱秉
章曾國藩奏勦辦常甯土匪拏獲首要各犯一摺前因安徽逆匪
勢甚彼猖當諭令曾國藩趕辦船隻礮位是否雇造齊全見在賊
匪攻圍廬郡雖經江忠源奏報屢次獲勝但援兵尙少朕心實深
懸繫曾國藩著仍遵前旨督帶船勇速赴安徽江面與江忠源等
合力兜擊至湖南常甯一帶土匪卽責成駱秉章迅卽妥辦務使
盡絕根株毋畱餘孽又據該撫片奏廣東解餉銀內有十萬五千
八百餘兩因湖北道路阻隔暫存湖南_{司庫}_{見在京餉待用}孔亟且有改撥安徽之款若俟江路肅清再行起解必致貽誤著
該撫速飭委員繞道行走並知照沿途小心護送毋稍遲誤將此

由六百里諭令知之○予湖南死事典史吳世昌祭葬世職○庚午諭內閣前因有人參奏勝保委員磁州知州恩符候選知縣方鴻恩有招搖鑽營劣蹟當經降旨飭查茲據勝保覆奏該二員尙無竊權舞弊質據見派方鴻恩寫立號簿分擬准駁並令恩符採辦硝礮火繩等語此等聲名狼藉之員何必畱於軍營致招物議恩符著仍飭令卽回本任方鴻恩著不准畱營差委○僧格林沁奏近聞獨流一帶有雍髮潛出者深恐該逆洞出探聽消息以便擇路豕突復探得逆匪各作麪餅用小袋裝盛其爲趕辦裹糧急思他竄無疑臣當派員前往慶祺軍營令其轉傳各營一體嚴加防範至前敵進仗情形我兵雖連日出隊無如該逆詭譎異常我兵往攻先必堅守窺我軍心懈慢伺隙方出臣思該逆恃險固守以逸待勞我兵如此進攻似難得力見已密致勝保步步爲營先

將營盤逼近再將天津海口七千斤至萬斤大礮運至營中此聚力能致遠若高築礮臺向內攻擊或可傾覆賊巢二十三日我兵失利失去礮位軍械無算臣聞信之下憤懣難名且謝子澄爲津郡循吏深洽輿情所帶義勇頗資得力今猝然陣亡設人心渙散郡城可慮之至二十六日曾據奕紀報天津義勇因謝子澄陣亡幾至生變臣當卽發去告示剴切安撫茲又據慶祺委員稟報該縣南里坦地方有青縣土匪結夥搶掠若不消患將萌深恐與該逆勾結亦經飛咨直隸督臣迅委幹員前往擒捕並嚴札該縣實力查拏以靖地方上諭軍機大臣等二十三日我兵進仗失利銳氣少挫疊經降旨嚴飭勝保督率將士併力攻勦以贖前愆見在該逆有裏糧思竄情形該大臣駐紮王慶坨地方足可堵禦北面惟由獨流至東安一路亦應派兵扼其要衝不可稍涉大意至

青縣土匪在南里坦地方乘機竊發難保不與該逆勾結該大臣見已知會桂良趕緊派委幹員迅速捕拏仍著於附近大營處所嚴密巡緝毋致蔓延將此由六百里諭令知之○勝保等奏謝降級畱任恩得旨是時悔已無及若再不知以國事爲重各存爭功見好之心則皆是該殺者朕言出法隨勝保等其共懷之又奏連日攻剿逆匪情形批逆匪死黨甚多若不盡行殲斃轉貽後患於無窮萬分緊時豈可先自開一省事之法將來直省完竣後除隨時土匪不計外如再有粵匪潛匿之事必將勝保正法○予直隸陣亡參領阿勒金泰等祭葬世職○是月賑山東濟甯等七州縣山西太谷縣浙江臨海縣福建永定等三縣廣東連州等二十二州縣被水災民並給修屋費蠲免直隸趙州等十七州縣被擾甘肅靖寧縣水災雹災新舊額賦蠲減江蘇川沙等四十三廳州縣

雲南建水等四州縣被擾被水地方額賦蠲緩山西太谷縣山東
德州等六十七州縣浙江海甯等五十九州縣衛湖南澧州等十
七州縣衛甘肅靜寧等二十一州縣暨隴西縣丞所屬水旱風霜
蟲雹災並被擾地方額賦展緩直隸祁州等十五州縣兩淮富安
等十四場窪地水災新舊額賦免甘肅中衛縣上年地震應徵銀
糧草束